

Aningaasaqarnermut Ataatsimiititaliap suliaq nr. 01.31.06/08-003 42 pillugu tallimangornermi ulloq 27. juni 2008-mi aalajangiinera pillugu Naalakkersuisunut ilisimatitsineq.

(Naalakkersuisut siulittaasuata ulloq 20. juni 2008-mi aalajangiinera)

Aalisartut piniartullu siunnersortinit sullinneqarnerannut aningaasat aningaasanut inatsimmi kontomi 20.11.70-mi immikkoortinneqarsimasut atugassanngortinneri

Naalakkersuisut inassutigaat,

- konto pingaarnermi 20.11.70-imi, Suliniutinut nutaanut sillimmatinut tunngasumi, aningaasaliissutit 1.234.000 kr.-inik ikilineqassasut.

- konto pingaarnermi 50.01.08-mi, Aalisartut piniartullu siunnersortinit sullinneqarnera nnut tunngasumi, aningaasaliissutit 1.234.000 kr.-inik amerlineqassasut.

Aningaasaqarnermut Ataatsimiititaliap oqaaseqaatai

Aningaasanut inatsimmi kontomi pingaarnermi 50.01.08-mi, Aalisartut piniartullu siunnersortinit sullinneqarnerannut tunngasumi, 1.234.000-it 2008-mi immikkoortinneqarnissaat siunnersuutaaqqaarpoq. Tamanna 2007-imi aningaasanut inatsimmut sanilliullugu tapiissutinik affannangortitsineruvoq. Aningaasaliissutinik taama ikililerineq Naalakkersuisut KNAPK-mut isumaqatigiissutaannut naapertuuttutut isigineqarpoq. Taamaalillunilu siunnersuisoqarfimmit atuisut, tamatuminnga ingerlatsinermi aningaasartuutit ilaannik toqqaannartumik matussusiinerisigut siunnersorteqarfimmut landskarsip aningaasartuutai isumaqatigiissut naapertorlugu ikilisinniarneqassapput.

Atuisunilli akiliisitsisalnissaq pillugu isumaqatigiissummi aalajangersakkanik KNAPK eqquutsinersoq Naalakkersuisunit KNAPK-millu isumaqatigiinngissutigineqarpoq 2008-mut aningaasanut inatsisissatut siunnersuutip suliarineqarneranut atatillugu paasineqarpoq. Taamatuttaaq siunnersuisoqarfimmik atuisunik akiliisitsisalnissaq manna tikillugu atuutsinneqalersimangitsoq isumaqartoqarpoq. Kiisalu siunnersuisoqarfimmik atuisartut akiliisinnaassuseqarnerat akileerusussuseqarnerallu eqqarsaatigalugu siunnersuisoqatigiinnut pisortat akiliutaasa ikilineqarnissaat ilumut periarfissaqavinnersoq qularutigineqartoq taamani oqaatigineqarpoq. Tamanna tunngavigalugu siunnersorteqarfiup sullississutaanik atuisunut akiliteqartitsisalnissaq pillugu KNAPK-p isumaqatigiissutikkut pisussaaffini eqquutsikkai uppersarsarneqarsinnaappat kontomut pingarnermut 50.01.08-mut atugassiissutigineqarsinnangorlugit Inatsisartut aningaasanut inatsisissatut siunnersuummik pingajussaaneerinissaannut allannguutissatut siunnersuut (nr. 158) aqqutigalugu 1.234.000 kr.-it kontomi pingaarnermi 20.11.70 sillimmatitut immikkoortinneqarput.

Piomasaaqatit arlallit Namminersornerullutik Oqartussanut isumaqatigiissummi aalajangersarneqartut Siunnersorteqarfimmit eqquutsinneqartutut Naalakkersuisunit maanna nalilerneqartoq isummernissamut tunngavissiamut Aningaasaqarnermut Ataatsimiititaliamut nassinneqartumi allassimavoq. Atuisunik akiliisitsisarneq pillugu allassimavoq katillugit 41.400 kr.-inik isertitaqartoqarsimasoq, taakkunanngalu 36.000 kr.-it tassaasut "Sineriassortoq"-mi usassarutitigut isertitat. Taamaalillunilu isertitat taakku tunngavigalugit siunnersorteqarfimmut aningaasaliissutit aningaasanut inatsisissatut siunnersuummi siunnersuutaaqqaartutut ikilisinneqarsinnaanerat naatsorsuutigineqarsinnaanngilaq.

Siunnersorteqarfimnulli aningaasaliissutit tamakkiisut ukiumoortumik katillugit 1.234.000 kr.-inik ikilisinneqartarnissaat aningaasanut inatsimmi atuuttumi ukiuni missingersuusiorfiusuni 2009-11-

imi suli ilaatinneqarpoq. Allamik aalajangertoqarnissaata tungaanut tassunga atatillugu Aningaasaqarnermut Ataatsimiititaliamit oqaatigineqassaaq aningaasaliissutinik 2009-mi taama ikiliartortitsinissap unneqqarilluni sulissutiginnissaanut KNAPK Naalakkersuisullu akisussaaff eqarmata. Tassungali aamma atatillugu oqaatigineqassaaq ukiumi missingersuusiorfiusumi siullermi kontomi pingaarnermi 50.01.08-mi aningaasaliissutinik ikilisitsinissamik anguniagaqarneq aningaasanut inatsisini amerlangaatsiartuni tunngavissatut ilanngunneqartarsimammat. Aningaasaliissutinik taama ikilisitsinissat arlaannaalluunniit piviusunngortinneqarsimanngilaq. Taamaattumik makku ersarissumik paasissutissiissutigineqarnissaat ataatsimiititaliap kissaatigaa: Siunnersorteqarfimmit sullissutinut atuisut akiliuteqartinneqartalerinissaat naalakkersuinikkut kissaatiginartinneqartutut Aalisarnermut, Piniarnermut Nunalerinermullu Naalakkersuisup isigaa? Aningaasanut inatsimmi atuuttumi ukiumi missingersuusiorfinni tunngavissaatinneqartutut siunnersorteqarfimmut aningaasaliissutit ikilisit 2009-mi aningaasanut inatsisissatut siunnersuummi immikkoortinneqarnissaat naalakkersuinikkut kissaatiginartinneqartutut Aalisarnermut, Piniarnermut Nunalerinermullu Naalakkersuisup isigaa? Taamaattoqassappallu tamanna Naalakkersuisunut ilaasortap qulakkiilersaarpaa?

Aningaasaqarnermut Ataatsimiititaliap aalajangiinera

Naalakkersuisut inassuteqaataat Aningaasaqarnermut Ataatsimiititaliamit **akuersissutigineqarput**

Inussiarnersumik inuulluaqqusillunga

Augusta Salling

Aningaasaqarnermut Ataatsimiititaliap siulittaasua